

starogradski

OPĆINA STARI GRAD
SARAJEVO



MUNICIPALITY OF STARI
GRAD SARAJEVO

haber

BESPLATAN PRIMJERAK • SEPTEMBAR, 2012. broj 15

- Starogradske džamije
- Intervju: Ibrahim Hadžibajrić
- Asfaltiranje ulica

Remont brane na Bentbaši



- 2-3 Za tri starogradske džamije 130.000 KM
- 4 Nova zgrada za 11 raseljenih porodica
- 5 Ozvaničen završetak popravka dijela Ferhadije
- 7 Rekonstruisana brana i očišćeno jezero na Bentbaši
- 8 Sanirana Šeher-ćehajina ćuprija
- 10-11 Intervju: Ibrahim Hadžibajrić, načelnik Općine
- 12 Novi asfalt za devet starogradskih ulica
- 18 Predstavljamo Mjesnu zajednicu „Hrid-Jarčedoli“
- 19 1001 starogradski biser: „Stećci - slovo vječnosti“



Impressum

Izdavač: Općina Stari Grad Sarajevo

Tiraž: 2.000

Pripremlili: Almedina Porča
Selma Velić
Alma Imamović
Alija Ibrović
Džavid Katica

DTP: Safet Mališević

Fotografije: Zijad Lokvančić

Štampa: DES d.o.o. Sarajevo

Adresa: Zelenih beretki br. 4
71000 Sarajevo

web: www.starigrad.ba

e-mail: info@starigrad.ba

Tel./fax: +387 33 282 385
+387 33 217 916

Projekti

Za tri starogradske džamije 130.000 KM



U toku restauracija unutrašnjosti Ferhadija džamije

Fontana kod bistričke džamije će biti visoka dva metra i imat će pet uglova, što simbolizuje pet vakata namaza, kazao Topčagić

Popravka tri džamije na području Općine Stari Grad: Šejh Feruhove, Gazi Mehmed-begove i Ferhad-begove džamije, je u toku.

Riječ je o projektima za koje je Općina Stari Grad u budžetu obezbijedila 130.000 KM.

Za rekonstrukciju Šejh Feruhove džamije, koja je u narodu poznata i kao Abdesthana i nalazi se u naselju Kovači, Općina Stari Grad je obezbijedila 60.000 KM.

Krov i munara Šejh Feruhove džamije oštećeni su usljed udara groma u munaru.


Komadi fasade s munare obrušili su se na krov i uništili ga. Završena je sanacija krova, na koji je postavljena ćeramida. Fasada na munari je sanirana i na nju je postavljen novi gromobran. U toku je sanacija stropa džamije, što bi trebalo da bude završeno do kraja septembra.

Popravka Gazi Mehmed-begove džamije u starogradskom naselju Bistrik podrazumijeva sanaciju stepeništa na ulazu u ovaj objekat, kao i izgradnju nove fontane u dvorištu džamije. Ovaj projekat Općina Stari Grad finansira s 20.000 KM.

Stepenište na ulazu u ovu džamiju

Gazi Mehmed-begova džamija

Džamija Gazi Mehmed-bega Ishakovića (sina Isa-beg Ishakovića) ili džamija Bistrik medresa, sagrađena je 1526. godine. U sastavu džamije je bila medresa i tekija. Džematlija ove džamije bio je sarajevski muftija Ibrahim Bistrigija, koji je u vremenu u kojem je živio govorio sedam jezika i završio sve visoke škole u Istanbulu. Tokom posljednjeg rata u BiH od 1992.-1995. godine džamija je pretrpila znatna oštećenja.



Za Ferhadiju 50.000 KM

Ferhad-begova džamija

Ferhad-begovu džamiju (Ferhadija džamiju) u Sarajevu izgradio je bosanski sandžak-beg Ferhad-beg Vuković-Desisalić 1561. i 1562. godine i s haremom proglašena je nacionalnim spomenikom Bosne i Hercegovine. Ferhad-beg je u sklopu džamije podigao mekteb, česmu i imaret (javnu kuhinju), koji su stradali u požaru 1697. godine. Mekteb je obnovio Mehmed-beg Dženetić, ali je i ta zgrada izgorjela 1879. godine. U ovom mektebu je jedno vrijeme bio muallim i poznati sarajevski ljetopisac Bašeskija. Od svih Ferhad-begovih objekata do danas su jedino sačuvani džamija i oko nje malo groblje.



Novo stepenište bistričke džamije

već je sanirano. Na njega su postavljene nove ploče, a na samom ulazu nova ograda. Sa obje strane stepeništa napravljena su dva potporna zida u dužini od oko deset metara i obložena su klesanim kamenom. Izgradnja fontane, koja će biti postavljena u dvorištu bistričke džamije, je u toku i najkasnije do Kurban bajrama bit će završena.

“Fontana će biti visoka dva metra i imat će pet uglova, što simbolizuje pet vakata namaza. Fontana će biti postavljena na betonsku podlogu koja je već napravljena u dvorištu džamije”, pojasnio je Fuad Topčagić, akademski kipar i

autor izgleda fontane. Ovo nije prvi projekat za Gazi Mehmed-begovu džamiju kojeg finansira Općina Stari Grad. Zahvaljujući donaciji Općine prošle godine je na džamiju postavljeno 12 novih prozora, ulazna vrata, sofe na ulasku u džamiju, ustakljena je musandera za obavljanje namaza tokom zime s ciljem uštede potrošnje grijanja.

Općina Stari Grad uključila se i u projekat rekonstrukcije Ferhad-begove, odnosno Ferhadija džamije. Projekat restauracije i konzervacije unutrašnjih zidova ove džamije Općina sufinansira s 50.000 KM.

Šejh Feruhova džamija

Graditeljska cjelina - Abdesthana (Šejh Feruhova) s grobljem i česmom u Sarajevu proglašena je 11. marta, 2011. godine nacionalnim spomenikom Bosne i Hercegovine. Džamija Šejha Feruha, poznata u narodu pod nazivom Abdesthana, smještena je iznad Kovača u mahali po kojoj je i dobila ime. Osnivač džamije je izvjesni Šejh Feruh, a izgrađena je prije 1516. godine.



Sanirana munara Šejh Feruhove džamije



Nova fontana za bistričku džamiju do Kurban bajrama

Oštećene ploče u Aleji ambasadora



Ponovni napad na Aleju ambasadora

Aleja ambasadora je ponovo bila na meti vandala. Posljednji put vandali su oštetili tri ploče sa imenima ambasadora.

“Jedna ploča je spala s mjesta na kojem stoji, druga je oštećena, a treća je poprskana sprejem i išarana”, istakli su u Službi za komunalne poslove i investicije Općine Stari Grad.

Ovo je još jedan čin nesavjesnog ponašanja i vandalizma neodgovornih građana u Aleji ambasadora. Do sada je Općina u nekoliko navrata izdvajala novac i mijenjala oštećene sadnice lipa, polomljene klupe i ploče, a kako bi se ovom vandalizmu stalo u kraj Općina



Vandali polomili ploče

Stari Grad planira postaviti kamere koje će biti pod stalnim nadzorom pripadnika Policijske uprave Stari Grad.

Novac za ovaj projekat bit će planiran u budžetu za narednu godinu.

Aleju ambasadora održava i uređuje KJKP “Park” čiji su zaposlenici tokom avgusta, pokosili travu i očistili Aleju od smeća i otpada. Pripadnici Dobrovoljnog vatrogasnog društva “Vratnik” svakog drugog dana su zalijevali vodom mlade sadnice lipa, kako bi ih spasili od suše.

Projekti

Nova zgrada za 11 raseljenih porodica

Gradnja nove zgrade za smještaj 11 interno raseljenih porodica na lokaciji Baruthana – Gazin han počeo će u ovoj godini, a novac za prvu fazu ovog projekta obezbijedili su Ministarstvo za rad, socijalnu politiku, raseljena lica i izbjeglice Kantona Sarajevo, Općina Stari Grad i Humanitarna organizacija “Hilswerk Austria International”. Najavljeno je ovo 9. jula, 2012. godine, nakon potpisivanja Generalnog sporazuma o načinu realizacije projekta “Izgradnja objekta kolektivnog stanovanja, lokalitet Baruthana – Gazin han za trajno stambeno zbrinjavanje interno raseljenih porodica”.

Ibrahim Hadžibajrić, načelnik Općine Stari Grad, je kazao kako bi zgrada tre-

balo da bude završena u junu ili julu naredne godine.

“Izgradnja nove zgrade koštat će oko 700.000 KM. Općina će obezbijediti 350.000 KM, zemljište za gradnju objekta i implementatora projekta oslobodit plaćanja dadžbina. Općina je platila izradu idejnog i izvedbenog projekta, tako da će naše učešće u ovom projektu biti više od 500.000 KM”, kaže Hadžibajrić.

Podsjetio je kako je u Općini Stari Grad bilo 29 interno raseljenih porodica, za koje je plaćan alternativni smještaj, što je općinski budžet u zadnjih 13 godina koštalo oko 1,3 miliona KM.

Obezbijeden je novac za prvu fazu projekta i u ovoj godini bit će položen kamen temeljac za gradnju zgrade.



Maketa nove zgrade za interno raseljene



S potpisivanja sporazuma

Zamijenjena stolarija i fasada na vrtiću “Biseri”

Postavljanjem nove fasade i stolarije na Dječjem vrtiću “Biseri” okončan je projekat utopljanja ovog objekta. “Svi stari drveni prozori sa ovog objekta su uklonjeni i postavljeni su novi, plastični. Fasada je postavljena na cijelom objektu”, potvrdili su u Službi za komunalne poslove i investicije Općine Stari Grad. Zamjena stolarije i postavljanje nove fasade na Dječjem vrtiću “Biseri” proveden je u sklopu projekta utopljanja ovog objekta. S novim prozorima i fasadom bit će smanjena potrošnja energije za grijanje. Projekat utopljanja Dječjeg vrtića “Biseri” koštao je 80.000 KM i zajedno su ga finansirali Ministarstvo prostornog uređenja FBiH s 50.000 i Općina Stari

Grad s 30.000 KM. Utopljanje objekta počelo je u junu, a završeno u avgustu 2012. godine. Izvođač radova bila je firma “Fain inžinjeri”.



Kvalitetno grijanje u vrtiću “Biseri”



Nova "pahuljica" u Ulici Ferhadija

Rekonstruisana je dionica centralne starogradske Ulice Ferhadija, što je i ozvaničeno 10. jula, ove godine.

Ovaj projekat podrazumijevao je zamjenu svih podzemnih instalacija i postavljanje novih granitnih ploča i to na dijelu od Tržnice do Ekonomskog fakulteta. Rekonstrukciju ovog dijela Ferhadije finansirala je Općina Stari Grad sa oko 320.000 KM, a izvođač radova bila je firma "Mibral".

"Zamijenjene su sve podzemne instalacije, te je napravljena armirano-betonska podloga debljine deset cm na koju su postavljene granitne ploče debljine osam cm. Postavljena je i nova pahuljica, simbol XIV Zimskih olimpi-

jskih igara održanih u Sarajevu 1984. godine. Odlučili smo se na detaljnu rekonstrukciju kako nam se ne bi dešavalo da svaki dan kopamo Ferhadiju zbog kvara podzemnih instalacija", pojasnio je Ibrahim Hadžibajrić, načelnik Općine Stari Grad, podsjetivši kako je Ferhadija zadnji put rekonstruisana 1982. godine. Na ceremoniji tokom koje je i ozvaničena rekonstrukcija dijela Ferhadije predstavljena su i dva vozila KJKP "Rad" za održavanje pješačkih zona. Riječ je o električnom usisivaču i električnom vozilu za čišćenje pješačkih zona. Oba vozila se napajaju električnom energijom i na taj način doprinose očuvanju okoliša.

Nove niše na pet lokacija

Postavljene su nove, natkrivene niše za kontejnere u pet starogradskih ulica: Franjevačka kod autopraonice, Ploča kod Muzeja "Alija Izetbegović", Sedrenik do broja 101, Carina i Bistrik ispod mosta. "U Ulici Berkuša mala preostalo je postavljanje metalne mreže i limenog pokrivača

koji će zaštititi kontejnere od padavina i spriječiti širenje neugodnih mirisa", pojasnili su u Službi za komunalne poslove i investicije Općine Stari Grad. Projekat s 30.000 KM finansira Općina Stari Grad, a izvođač radova je KJKP „Rad“.



Nove niše u Ulici Carina



Ploča kod muzeja "Alije Izetbegović"

Potporni zid u Ulici Save Skarića



Novi potporni zid dug 40 metara

Izgrađen je novi armirano-betonski potporni zid u Ulici Save Skarića u starogradskoj Mjesnoj zajednici Mjedenica.

"Na ovoj lokaciji izgrađen je novi armirano-betonski zid u dužini od oko 40 metara. Osim gradnje zida, završeno je i postavljanje drenažnih cijevi za odvodnju podzemnih i oborinskih voda", pojasnili su u Službi za komunalne poslove i investicije Općine Stari Grad.

Gradnji novog prethodilo je uklanjanje starog, dotrajalog potpornog zida na istoj lokaciji. Izgradnju novog zida s 46.000 KM finansirala je Općina Stari Grad, a izvođač radova bila je firma "Džekos".

Uklonjen zid u Ulici Konak br. 5



Uklonjen zid kod osnovne škole

Uklonjen je stari i ruševni potporni zid u Ulici Konak br. 5 u starogradskoj Mjesnoj zajednici Bistrik. Riječ je o zidu koji se nalazio u neposrednoj blizini Osnovne škole "Edhem Mulabdić".

"Zid je bio u ruševnom stanju i predstavljao je opasnost za učenike ove starogradske osnovne škole, ali i za ostale prolaznike i automobile", saopćeno je iz Službe za komunalne poslove i investicije Općine Stari Grad.

Uklanjanje ovog zida Općina Stari Grad finansirala je sa 1.500 KM, a izvođač je bila firma "Hise AA".

Općinsko vijeće

41. sjednica

Općinskog vijeća

Rebalans budžeta Općine Stari Grad za 2012. godinu u iznosu od 20,025.722 KM usvojen je na 41. sjednici Općinskog vijeća, održanoj 28. jula, 2012. godine. Nakon što je na majskoj sjednici prijedlog rebalansa pretočen u nacrt, ovaj dokument je bio na

javnoj raspravi u kojoj su mogli učestvovati svi klubovi stranaka u Općinskom vijeću Stari Grad, savjeti mjesnih zajednica, ali i sami građani. Rebalans je usvojen uz prijedlog Adnana Mujčića, vijećnika SDA, da se 10.000 KM namijenjenih za izradu replike begovske nošnje (projekat "Selamluk") preusmjeri na izgradnju dječjeg igrališta u MZ Medrese.

Suljo Agić, vijećnik SDA, tražio je pojašnjenje u vezi sa zaključkom da u rebalansu bude uvrštena nova stavka za kupovinu tri kombi vozila za potrebe građana Općine Stari Grad, istakavši da ovaj zaključak treba staviti van snage ako ga nema u rebalansu. Načelnik Općine Stari Grad Ibrahim Hadžibajrić je podsjetio vijećnike kako je za tri kombi vozila potrebno obezbijediti oko 390.000 KM koji nisu uvršteni u rebalans jer tog novca nema. Vijećnike je upoznao o presudi Ustavnog suda FBiH u vezi sa Zakonom o koncesijama KS, zbog kojeg vijećnici prošle godine nisu podržali odluku o dodjeli građevinskog zemljišta za izgradnju podzemne garaže "Šahinagića ulica". Novcem od prodaje zemljišta, bili bi stvoreni uslovi za kupovinu kom-

bija. Imajući to u vidu Hadžibajrić je pozvao vijećnike da ponovo razmotre prijedlog o dodjeli građevinskog zemljišta u Šahinagića ulica.

"Ako se Općinsko vijeće slaže, službe će već za avgustovsku sjednicu pripremiti materijal za Prijedlog Rješenja o sticanju prava na gradsko građevinsko zemljište po Javnom konkursu radi izgradnje podzemne garaže "Šahinagića ulica", istakao je Hadžibajrić. Na 41. sjednici Općinskog vijeća usvojen je i Prijedlog Odluke o dodjeli pomoći za sanaciju štete od elementarne nepogode. Općinsko vijeće je jednoglasno potvrdilo



Vijećnici usvojili rebalans budžeta

imenovanje Suade Hadžić za pravobranioca Općine Stari Grad.

"Zahvaljujem se na povjerenju koje mi je ukazala zakonodavna vlast Općine Stari Grad. Nastavit ću obavljati svoje dužnosti u skladu sa zakonima i Ustavom BiH", istakla je Hadžić. Općinsko vijeće je na 41. sjednici podržalo inicijative Gradimira Gojera, vijećnika Stranke za BiH koji je zatražio da se razmotri izgradnja azila za napuštene pse, oformi biznis-centar u Općini Stari Grad koji bi pomagao građanima pri registraciji firmi, zabrani rad kladionica na udaljenosti 500 metara od obrazovnih institucija, te da se usele teatarski sadržaji u Despića kuću u kojoj su se održavale prve teatarske predstave u Sarajevu.

42. sjednica

Općinskog vijeća

Općina Stari Grad određena je kao jedinstveno matično područje za sva naseljena mjesta sa sjedištem u ovoj lokalnoj zajednici. Definirano je ovo u Odluci o jedinstvenom matičnom području, koja je jednoglasno usvojena na sjednici Općinskog vijeća Stari Grad, održanoj 5. septembra, 2012. godine. Hidajeta Kadrić, pomoćnica načelnika za opću upravu, istakla je kako je usvajanje ove Odluke propisano u novom Zakonu o matičnim knjigama FBiH. "U ovoj Odluci Općina Stari Grad potvrđena je kao jedinstveno matično područje i u odnosu na raniji period nema izmjena u ovoj oblasti.

Općina Stari Grad je, po Odluci, sjedište matičnog područja. Matične knjige rođenih i umrlih za Općinu Stari Grad vodit će se u sjedištu matičnog područja. Matična knjiga vjenčanih



Hidajeta Kadrić

ove Općine vodit će se kao jedinstvena knjiga za sva naseljena mjesta u kojima se sklapaju brakovi, a matična knjiga državljana vodi se kao jedinstvena knjiga za cijelo područje Općine Stari Grad", pojasnila je Kadrić. Osim ove Odluke vijećnici su na 42. sjednici Općinskog vijeća usvojili zaključak o pristupanju utvrđivanja prečišćenog teksta Statuta Općine Stari Grad i prečišćenog teksta Poslovnika Općinskog vijeća Stari Grad. Na istoj sjednici vijećnici su Hamzu Duvnjaka razriješili dužnosti predsjednika Komisije za propise i Statut i za novog rukovodioca ovog radnog tijela imenovali Alana Dorfera.

Dužnosti člana Komisije za pitanja boraca i žrtava rata razriješili su Dženanu Mistrić, a na istu poziciju imenovali su Abida Šehovića.

Priča s naslovne strane

Projekti

Rekonstruisana brana i očišćeno jezero na Bentbaši

Brana na Bentbaši je u potpunosti rekonstruisana i jezero je očišćeno što je rezultiralo povećanjem akumulacije vode u ovom jezeru.

Rekonstrukcija brane podrazumijevala je sve elektro-mašinske radove neophodne za njeno normalno funkcionisan-

je. Završeni su i građevinski radovi koji su podrazumijevali krečenje sale, zamjenu prozora i izolacije.

Osim toga očišćeno je i jezero. Iz jezera, od tunela kod Aleje ambasadora pa do Šeher-čehajine ćuprije, izvučeno je oko 15.000 kubika šljunka. Na poslovima čišćenja jezera bili su angažovani i pripadnici Dobrovoljnog vatrogasnog društva "Vratnik" koji su uz pomoć mehanizacije iz Miljacke izvlačili trupce koje je voda donijela iz gornjeg toka.

Remont brane i čišćenje jezera realizovani su s ciljem povećanja akumulacije vode u jezeru. Ove godine, zahvaljujući projektu remonta brane, zapremina jezera povećana je za oko 30.000 kubika vode. Neophodno je istaći kako nijedna od ovih aktivnosti nije rađena posljednjih 30 godina.

Ove godine brana na jezeru svake noći je spuštana u visini od jednog metra. Spuštanje brane omogućilo je protok vode i čišćenje korita Miljacke kroz čitavo Sarajevo.

Spuštanjem brane također je spriječeno širenje smrada iz korita Miljacke u ljetnom periodu, što je ranijih godina bio problem u Sarajevu. Unatoč velikim sušama tokom ljetnog perioda nivo vode u jezeru održan je u punom kapacitetu i mogu ga koristiti i helikopteri za punjenje spremnika za gašenje požara.



Akumulacija jezera povećana za 30.000 kubika

je. U sklopu ovog projekta u mašinskoj sali ugrađeni su novi elektromotori, kočnice, zaštitne i elektro sklopke, kao i



Iz jezera izvučeno oko 15.000 kubika šljunka

Novi poslovni objekat u Starom Gradu



Projekat koštao 47.600 KM

Izgrađen je novi zamjenski poslovni prostor u Ulici Ćurčiluk mali br. 23. U ovoj ulici ranije se nalazio stari i dotrajali poslovni prostor. Općina Stari Grad pristupila je uklanjanju tog i izgradnji novog poslovnog prostora s prizemljem i galerijom. Izgradnju novog poslovnog prostora s 47.600 KM finansirala je Općina Stari Grad, a izvođač je bila firma "Neimari".

Uređenje mjesnih zajednica



Okrećeno šest mjesnih zajednica

Krećenje starogradskih mjesnih zajednica Bašćaršija, Mahmutovac, Babića bašča, Bistrik, Mjedenica, Toka-Džeka i Kovači je završeno.

Krećenje i uređenje prostorija mjesnih zajednica je realizovano u sklopu tekućeg održavanja ovih objekata na području Općine Stari Grad.

"U toku su molerski radovi u Mjesnoj zajednici Ferhadija, kao i nabavka stolica i oglasnih panoa za svih šesnaest mjesnih zajednica Starog Grada", saopćeno je iz Sektora za poslove s mjesnim zajednicama Općine Stari Grad.

Voda za mještane Starog Grada



Vododsnabđivanje domaćinstava

Općina Stari Grad je, tokom ljetnog perioda, organizovala isporuku vode za mještane padinskih naselja.

Pripadnici Dobrovoljnog vatrogasnog društva "Vratnik" cisternama su isporučivali vodu za mještane naselja Barice i Donje Biosko.

"Pomoć od Općine Stari Grad zatražili su mještani ova dva naselja jer su im tokom ljetnog perioda presušili lokalni izvori. S obzirom da je suša trajala duži period mještanima ovih naselja voda je bila isporučivana u više navrata", saopćeno je iz Općine Stari Grad.

Očišćen otpad sa Žute tabije



Općina reagovala na zahtjev građana

Služba za komunalne poslove i investicije Općine Stari Grad reagovala je na web pitanje upućeno od građana o otpadu koji je bio odložen pored Žute tabije. Ustanovljeno je da su posjetioci poslije iftara, tokom Ramazana, ostavljali velike količine smeća. Služba je stupila u kontakt sa KJKP "Rad" i zatražila svakodnevno prikupljanje i odvoz smeća sa Žute tabije, što je u većoj mjeri ispoštovano. Po završetku Ramazana pristupilo se temeljitom čišćenju Žute tabije i odvozu smeća, tako da ovaj nacionalni spomenik sada ponovo sija starim sjajem.

Projekti



Šeher-ćehajina ćuprija je sanirana i sa obje strane mosta postavljene su kamene ćursije (branic) s ciljem sprječavanja prolaska automobila preko njega.

Sanacija ćuprije podrazumijevala je postavljanje nove hidroizolacije koja će onemogućiti ulazak vode u kamene blokove i pucanje sedre, ugradnju novih kamenih blokova i ograde s obje strane mosta.

Šeher-ćehajina ćuprija oštećena je u februaru, nakon snježnih padavina. Tokom ispitivanja ustanovljeno je kako je

usljed mehaničkog pritiska na ogradu mosta došlo do nagnječenja dijela konstrukcije od sedre ispod kamene podloge.

Izvođač radova u ovom projektu bila je firma "Neimari", dok je nadzorni organ bio Zavod za zaštitu kulturno-historijskog i prirodnog naslijeđa Kantona Sarajevo na čelu s profesorom Zlatkom Langofom. Projekat je koštao 32.000 KM od čega je Općina Stari Grad obezbijedila oko 22.000 KM, a preostali dio novca firma "Neimari".

Nastavljena sanacija Vratničkog bedema

Pripremni radovi za sanaciju Vratničkog bedema su počeli i u toku je raščišćavanje zida od rastinja i slabog vezivnog kamena.



Sanacija bedema u dužini od 28 metara

Dio Vratničkog bedema, koji se nalazi u Ulici Bakije sokak u neposrednoj blizini Strošičke tabije, bit će saniran u dužini od oko 28 metara. Projekat će koštati 40.000 KM, a finansirat će ga Općina Stari Grad. Izvođač radova je firma "Neimari".

U Zavodu za zaštitu kulturno-historijskog i prirodnog naslijeđa KS pojašnjavaju kako će zid biti saniran u postojećoj visini od 2,5 do tri metra. Kamene će biti vraćene na mjesta na kojima nedostaje i bit će sanirana postojeća udubljenja.

Sanacija ovog dijela Vratničkog bedema nastavak je projekta koji je počeo prošle godine, kada je saniran zid u dužini od 55 metara. Sanaciju Vratničkog bedema prošle godine finansirala je Općina Stari Grad s 91.000 KM.

Očišćeno devet lokacija na području Starog Grada

Volonteri, pripadnici Dobrovoljnog vatrogasnog društva "Vratnik", uposlenici komunalnih preduzeća "Park" i "Rad" i Općine Stari Grad, te članovi nevladinih organizacija među kojima su bili i aktivisti NVO altruista "Svjetlo" 9. septembra, su, čišćenjem nekoliko lokacija u Starom Gradu, dali svoj doprinos akciji "Let's Do It – očistimo zemlju za 1 dan".

Akcija je provedena na četiri lokacije: Bentbaši, Aleji ambasadora, Bijeloj tabiji i Baricama i njen organizator bilo je Udruženje "Ruke".

Akciji se pridružio i Ibrahim Hadžibajrić, načelnik Općine Stari Grad, koji je zajedno s volonterima čistio lijevu obalu Miljacke na Bentbaši.

"Na lijevoj obali Miljacke, koja je očišćena od smeća i šiblja, postaviti ćemo klupe i kompletan prostor ćemo osvi-



Čišćeno izletišta Barice

jetiti kako bismo napravili ugodan ambijent za odmor naših građana", poručio je Hadžibajrić.

U sklopu ove akcije očišćeno je i mezarje u Ulici Hadžiabdinica kod broja 7. S ciljem pružanja podrške akciji "Let's

Do It" Općina Stari Grad je 8. septembra, u saradnji s KJKP "Rad", organizovala čišćenje četiri deponije na lokacijama: Močila – biciklistička staza, Jarčedoli (Popov gaj), Bistrički potok do brane i Krka br. 5.

U akciji učestvovalo oko 100 volontera

U akciji "Let's Do It – Očistimo zemlju za 1 dan" učestvovalo je oko 100 osoba i sa četiri lokacije uposlenici KJKP "Rad" odvezli su oko pet tona smeća.

Otpad s Bijele tabije čistila su 24 volontera, dok je na Bentbaši, s desne i lijeve obale Miljacke, smeće uklanjalo 25 osoba. U Aleji ambasadora bilo je angažovano 25 volontera, a na izletištu Barice njih 20.

U KJKP "Rad" su kazali kako je sa sve četiri lokacije odvezeno oko pet tona smeća. I u akciji koja je bila organizovana 8. septembra, uposlenici ovog preduzeća s četiri lokacije odvezli su oko četiri tone smeća.



Vatrogasci u akciji čišćenja na Bijeloj tabiji



Volonteri na Bentbaši



U akciji načelnik Hadžibajrić

Intervju: Ibrahim Hadžibajrić, načelnik Općine Stari Grad Sarajevo

Starom Gradu neophodna multimedijalna dvorana

U posljednjih šest do osam mjeseci veliki broj građana mi se obratio sa zahtjevima za pomoć u bavljenju poljoprivredom i stočarstvom i to ćemo ispoštovati, istakao Hadžibajrić

Na području Općine Stari Grad u protekle četiri godine realizovano je više od 300 projekata za šta je utrošeno oko 26,8 miliona KM, istakao je Ibrahim Hadžibajrić, načelnik Općine Stari Grad. Naglasio je kako će, ukoliko dobije povjerenje građana na lokalnim izborima u oktobru, prioriteta u njegovom radu biti komunalni, ali i projekti iz oblasti poljoprivrede, obrazovanja, kulture, sporta.

“Poseban akcenat ćemo staviti na zamjenu i izgradnju vodovodne i kanalizacione mreže jer je nedopustivo da u 21. vijeku ljudi nemaju ni vode ni kanalizacije. Jedan od ključnih problema Starog Grada u njegovom užem gradskom jezgru je nedostatak parking prostora i istrajat ćemo u ideji izgradnje podzemnih garaža”, istakao je Hadžibajrić.

□ *Tokom Vašeg četverogodišnjeg mandata kao načelnika Općine Stari Grad realizovano je na stotine projekata iz različitih oblasti. Možete li napraviti kratak osvrt na posljednje četiri godine?*

- Za realizaciju različitih projekata na području Općine Stari Grad u protekle četiri godine izdvojeno je više od 26, 8 miliona KM, od čega je oko 18 miliona obezbijeđeno u općinskom budžetu.



Na projekte iz budžeta utrošeno 18 miliona KM

Akcenat je stavljen na infrastrukturu, te je dosad rekonstruisano, sanirano i asfaltirano više od 120 ulica u Starom Gradu. Moram spomenuti dva velika projekta: izgradnja novog puta Iza gaja i rekonstrukcija puta Višegradska kapija-Faletići, koji su zajedno koštali više od 850.000 KM. Izgradili smo dva mosta: na Mošćanici i Obhodži, novu školu za osnovce na Sedreniku i aneks školskog objekta na Vrhbosni, novu džamiju u At mejdanu, zgradu na Brusuljama za devet interno raseljenih porodica,

objekat Besarina čikma. Ne smijemo zaboraviti ni najveći poslovni objekat u Starom Gradu - Kvadrant XII. Puno truda je uloženo na uređenju centralnog starogradskog jezgra, tako da su ulice Bravadžiluk i Sarači sada u novom ruhu, s potpuno izmijenjenim podzemnim instalacijama i novim pločama, a rekonstruisali smo i dio Ferhadije. Postavili smo i pet info-panoa sa kulturno-historijskim znamenitostima Starog Grada, a u pripremi su i novi, čime smo olakšali boravak turistima u našoj Općini. Po prvi put je otvoren turistički info-punkt u Saračima. Više od 1,2 miliona KM izdvojili smo za izgradnju i sanaciju potpornih zidova. Za postavljanje ograda, trotoara, stepeništa i niša dali smo oko 265.000 KM. Rješavali smo problem vodosnabdijevanja i kanalizacije za hiljade mještana starogradskih naselja. Stanovnici dijela Sedrenika dobili su novu Hidroflex stanicu čime je riješen problem vodosnabdijevanja star četrdeset godina, a sanirali smo i Mjedenički potok čime su stanovnici dijela MZ Mjedenica dobili kvalitetnu kanalizacionu mrežu. Rekonstrukcijom kanalizacione mreže na lokaciji Bentbaša-Podcarina omogućili smo da

Posebna pažnja zakonskim propisima

□ *Kakav stav ćete imati prema zakonskim propisima KS, a koji se tiču djelovanja lokalnih zajednica?*

U narednom periodu još više inicijativa iskazivat ćemo za izmjenom određenih zakona na nivou Kantona Sarajevo. Primjeri iz neposredne prošlosti pokazuju nam da je to moguće. Na inicijativu naše Općine pred Ustavnim sudom FBiH pokrenut je postupak kojim je u junu, ove godine utvrđeno da je Kanton Sarajevo, usvojivši Zakon o koncesijama, povrijedio pravo općina Stari Grad, Novo Sarajevo i Vogošća na lokalnu samoupravu. Upravo zbog Zakona o koncesijama KS osporena je izgradnja podzemne garaže preko puta Vijećnice u Šahinagića ulici. Cilj nam je pojednostaviti funkcionisanje lokalne samouprave što je u interesu građana koji, općenito, od općina očekuju puno više nego što su njihove nadležnosti.

otpadne fekalije s lijeve obale Miljacke budu odvedene u centralni kolektor tj. prečistač. Samo ovaj projekat koštao je 400.000 KM. U cilju stimulanja poljoprivredne proizvodnje u ovom periodu smo donirali 75 plastenika stanovnicima naše općine.

Prioriteti

□ *Ukoliko dobijete povjerenje građana, šta će biti Vaši prioriteti u narednom periodu?*

- Iako je u prethodne četiri godine mnogo urađeno u oblasti komunalne infrastrukture u Starom Gradu, posao još nije završen. Procjenjujem da je urađeno 60 odsto posla. Preostalo je još 40 odsto. Svega 30 odsto teritorije Starog Grada je urbana sredina, dok je ostatak padinski dio u čiju se infrastrukturu godinama nije ništa ulagalo. Trend sanacije i izgradnje ulica i komunalne infrastrukture u ovom dijelu, koji smo negovali prethodne četiri godine, nastaviti ćemo i ubuduće. Poseban akcenat ćemo staviti na zamjenu i izgradnju vodovodne i kanalizacione mreže jer je nedopustivo da u 21. vijeku ljudi nemaju ni vode ni kanalizacije. Jedan od ključnih problema Starog Grada u njegovom užem gradskom jezgru je nedostatak parking prostora i istrajati ćemo u ideji izgradnje podzemnih garaža. Ponovo ćemo pokrenuti procedure za izgradnju ovih garaža na već poznatim lokacijama. Uzimajući u obzir ozbiljnost i težinu ekonomske situacije



Kasarna Jajce jedan od prioriteta

u kojoj se nalazimo, još više ćemo se uključiti u podsticaj i razvoj poljoprivrede i stočarstva. U posljednjih šest do osam mjeseci veliki broj građana mi se obratio sa zahtjevima za pomoć u bavljenju poljoprivredom i stočarstvom



Hadžibajrić: Ustrajat ćemo u izgradnji podzemnih garaža

i to ćemo ispoštovati. Podržat ćemo uzgoj povrća i krupne i sitne stoke. Na području Općine Stari Grad postoje brojne mikrolokacije značajne, kako sa kulturno-historijskog, tako i administrativnog aspekta. U tom smislu, od postojeće raspoložive infrastrukture, težiti ćemo formiranju novih službi koje bi se bavile održavanjem tih lokacija. Svi poslovi iz domena Službe za socijalnu zaštitu, kao i Službe za komunalne poslove i ostalih službi radit će se istim kapacitetom. Na desnoj obali Miljacke izgradili smo tri savremena sportska

zabavu, te omogućili izvođenje kvalitetnije nastave iz tjelesnog i zdravstvenog odgoja. Za dva takva igrališta već je završena kompletna projektna dokumentacija i već na proljeće naredne godine može početi njihova izgradnja.

Kapitalni projekti

□ *Šta će biti kapitalni projekti za Općinu Stari Grad?*

- Ono što nedostaje Starom Gradu, kada govorimo o kapitalnim projektima, je jedna velika multimedijalna dvorana za sportske i kulturne sadržaje. Mladim ljudima treba pružiti mogućnost da iskažu svoj talent kroz bavljenje sportom ili nekim drugim aktivnostima. Osim toga, Stari Grad treba biti prepoznatljiv i kao mjesto održavanja velikih sportskih, muzičkih i drugih događaja, za što je neophodno izgraditi takvu dvoranu, kao i sportsko igralište većeg kapaciteta.

□ *U proteklom periodu svakodnevno ste sarađivali s načelnicima drugih općina. Kako ocjenjujete rad lokalni vlasti u posljednje četiri godine?*

Teško je općenito govoriti o radu lokalnih vlasti, jer sve općine nisu iste i susreću se s različitim problemima u radu. Ne raspolazu sve općine jednakim finansijama. Dok neke imaju velike budžete, druge nemaju dovoljno novca ni za plate uposlenika. Prije svega, neophodno je prilagoditi zakone čime bi bio osiguran rad općina u punom kapacitetu.

Sanacija spomenika

□ *Osim izgradnje dvorane kojim projektima će biti posvećena pažnja?*

U svim mjesnim zajednicama, kao i u prethodnom periodu, veliku pažnju posvetit ćemo komunalnim projektima: vodosnabdijevanje, kanalizaciona mreža, rekonstrukcija i asfaltiranje ulica, izgradnja potpornih zidova, uređenje dječjih igrališta i sportskih terena. U planu nam je uređenje Bašćaršijskog trga, rekonstrukcija kasarne Jajce, kao i Kuće porodice Sabur, jedne od najstarijih kuća u Sarajevu.

igrališta sa vještačkom travom: kod OŠ "Saburina", OŠ "Vrhbosna" i OŠ "Hamdija Kreševljaković". Zadatak nam je da i s lijeve strane izgradimo barem tri takva igrališta čime bismo djeci obezbijedili kvalitetniji prostor za igru i

Starogradske ulice

Novi asfalt za devet starogradskih ulica

Devet starogradskih ulica asfaltirano je u posljednja dva mjeseca. Riječ je o ulicama: Brusulje, Carina, Hladivode, Hadžidamjanova, Kamenica, Sarajevskih gazija, Sedrenik, Za Beglukom i Hošin brijeg čikma. Asfaltiranje ulica sa oko 140.000 KM finansirala je Općina Stari Grad, a izvođač je bilo KJKP "Rad".

Brusulje



Brusulje

Novi asfalt u Ulici Brusulje postavljen je od broja 63 prema rezervoaru, odnosno na dijelu ulice koji ranije nikad nije imao asfalt. Ulica je asfaltirana u dužini od oko 150 i širini od 3,5 do četiri metra. U sklopu projekta ugrađene su monolitne betonske rešetke za prikupljanje vode, čime je riješen problem odvodnje površinskih voda. Asfaltiranje ove ulice koštalo je oko 23.500 KM.

Carina



Carina

Ulica Carina asfaltirana je u dužini od oko 100 metara. Asfaltiranju ove ulice prethodilo je skidanje starog asfalta i kaldrme i izdizanje šahtova i rešetki za odvodnju površinskih voda. Projekat je koštao oko 13.800 KM.

Hladivode



Hladivode

Ulica Hladivode (prema rezervoaru) asfaltirana je u dužini od oko 160 metara. U ovoj ulici je uklonjen stari, izlomljeni i dotrajali asfalt. Put je izravan, izdignuti su šahtovi, slivnici i rešetke na potrebnu visinu zbog pravilne odvodnje površinskih voda, te postavljen završni sloj asfalta. Projekat je koštao oko 16.500 KM.

Hadžidamjanova



Hadžidamjanova

Slijepi krak Ulice Hadžidamjanova asfaltiran je u dužini od 126 metara. U ovoj ulici stari asfalt zamijenjen je novim, a šahtovi, šiberi i rešetke podignuti su na potrebnu visinu. Asfaltiranje ove ulice bila je donacija firme KJKP "Rad" Općini Stari Grad.

Kamenica



Kamenica

Dio Ulice Kamenica asfaltiran je u dužini od oko 70 metara. Rekonstrukcija je podrazumijevala skidanje starog asfalta i podloge, postavljanje novog tampona, izdizanje šahtova i šibera radi pravilne odvodnje, te asfaltiranje ulice. Asfaltiranje je koštalo oko 23.000 KM.

Sarajevskih gazija



Sarajevskih gazija

Novi asfalt postavljen je u Ulica Sarajevskih gazija od broja 17 do broja 23, odnosno u dužini od 140 metara. Osim asfalta post-

avljene su i bankine sa obje strane ulice. Za ovaj projekat obezbijedeno je 16.500 KM.

Sedrenik



Sedrenik

Saniran je i asfaltiran makadamski krak Ulice Sedrenik kod rezervoara i to u dužini od 136 metara. U sklopu ovog projekta ugrađen je novi tampon, postavljene su betonske slivne rešetke i šahtovi na odgovarajuću visinu zbog pravilne odvodnje površinskih voda, novi ivičnjaci i na kraju asfalt debljine sedam centimetara. Asfaltiranje ove ulice koštalo je oko 28.000 KM.

Za Beglukom



Za Beglukom

Novi asfalt u Ulici Za Beglukom postavljen je u dužini od 64 metra. Asfaltirana je dionica ulice od novog kamenog stepeništa, izgrađenog prošle godine, prema kaldrmi. Asfaltiranje Ulice Za Beglukom koštalo je oko 8.200 KM.

Hošin brijeg čikma



Hošin brijeg čikma

Hošin brijeg čikma do broja 54 asfaltirana je u dužini od 70 i širini 3,4 metara. U sklopu ovog projekta pored asfaltiranja izgrađen je novi prilazni put kućama i okretnica za vozila. Ovaj projekat koštao je oko 9.500 KM.



Popravljen plato ispred DVD "Vratnik"

Rekonstrukcija požarnog odnosno prilaznog puta garažama Dobrovoljnog vatrogasnog društva "Vratnik" je urađena početkom septembra, ove godine.

U sklopu ovog projekta rekonstruisan je požarni plato DVD "Vratnik" površine od 170 metara kvadratnih.

"Radovi su podrazumijevali uklanjanje starog i dotrajalog asfalta, ravnanje terena, te asfaltiranje cijelog

platoa. Pored toga, postavljeni su i novi ivičnjaci u dužini od 21 metra", pojašnjavaju u Službi za komunalne poslove i investicije Općine Stari Grad.

Požarni put bio je u lošem stanju i nije više mogao podnijeti saobraćanje cisterni teških 26 tona.

Projekat asfaltiranja požarnog puta sa oko 21.000 KM finansirala je Općina Stari Grad, a izvođač radova bio je KJKP "Rad".

Ograda oko OŠ "Sedrenik"

Nova ograda s kapijama za pješake i vozila postavljena je oko područne osnovne škole "Sedrenik". Ograda je postavljena oko objekta, a kapija na ulazu u školu. Montirana je i kapija na ulazu na parking. Osim čelične ograde oko školskog objekta, postavljeni su rukohvati za vanjsko stepenište i rampa za invalide. Postavljanje ograde realizovano je u sklopu vanjskog uređenja ove osnovne škole. Izradu i ugradnju ograde sa oko 28.500 KM finansirala je Općina Stari Grad.



Nova ograda na ulazu u školu

Krpljenje ulica

U toku je sanacija oštećenih kolovoznih površina i krpljenje udarnih rupa u ulicama Sedrenik 1. bataljon i Čavrkov sokak. Ove sanacije rade se u okviru redovnog ljetnog održavanja cesta. Do sada je urađena sanacija na platou ispred Općine Stari Grad, te u ulicama Kračule, At mejdan, Hambina carina, Paje, Dugi sokak Velika Berkuša i Hrid kod OŠ "Šejh Muhamed ef. Hadžijamaković".

Sanirano stepenište

Sanirano je stepenište ispred Mjesne zajednice Bistrik. Popravka je podrazumijevala sanaciju gazišta koje je bilo oštećeno. U sklopu sanacije stepeništa fiksirana je i ofarbana postojeća željezna ograda. Izvođač radova u ovom projektu bila je firma „Balkan kamen“ iz Sarajeva, a sanaciju sa oko 456 KM finansirala je Općina Stari Grad.

Nova mreža za dva naselja

Pogledine



Priključci za pet domaćinstava

Rekonstruisana je kanalizaciona mreža u Ulici Pogledine u Mjesnoj zajednici Hrid – Jarčedoli. "U ovoj ulici kod broja 1 mještani nisu imali kanalizacionu mrežu, tako da je postavljena nova mreža u dužini od 56 metara", istakli su u Službi za komunalne poslove i investicije, te dodali da su u sklopu projekta urađeni i priključci za pet domaćinstava. Izgradnja mreže u Ulici Pogledine koštala je oko 25.000 KM. Finansijer je bila Općina Stari Grad, a izvođač radova firma "SET Invest".

Baruthana



Novi fekalni sistem

Rekonstrukcija kanalizacione mreže u Ulici Baruthana u starogradskoj Mjesnoj zajednici Mošćanica urađena je početkom jula, ove godine. Zamijenjen je postojeći fekalni sistem i postavljene nove kanalizacione cijevi. Postojeći sistem bio je nedovoljan da primi kompletnu odvodnju pa su se fekalije izljevale na ulicu.

Vrijednost ovog projekta bila je oko 40.000 KM i finansirala ga je Općina Stari Grad.

Nagrada za bh. odbojkaše



Bh. reprezentativci u Općini Stari Grad

Općina Stari Grad novčano će nagraditi reprezentaciju Bosne i Hercegovine u sjedećoj odbojci za zlato osvojeno na XIV Paraolimpijskim igrama u Londonu, kazao je Ibrahim Hadžibajrić, načelnik Općine Stari Grad, na prijemu reprezentativaca BiH u sjedećoj odbojci, održanom 13. septembra, u Općini Stari Grad.

Reprezentacija BiH u sjedećoj odbojci sedam puta zaredom ponijela je titulu evropskog prvaka. Zlatnu medalju osvojili su i na Svjetskom prvenstvu u sjedećoj odbojci, a pobjedom u Londonu ponijeli su još jednu titulu, drugu po redu, paraolimpijskih prvaka.

Prijem bh. reprezentativaca u Općini Stari Grad postao je tradicionalna aktivnost, koju već četvrtu godinu zaredom organizuje Hadžibajrić sa svojim saradnicima.

Za osnovce 40.000 KM



Pomoć za 225 osnovaca

Općina Stari Grad je u budžetu za ovu godinu obezbijedila oko 40.000 KM za kupovinu udžbenika, finansiranje užina i ekskurzija za osnovce čije su porodice slabijeg imovinskog stanja.

Posredstvom Službe za obrazovanje, kulturu i sport za užine za oko 150 učenika svih osnovnih škola na području Općine Stari Grad obezbijedeno je 20.000 KM, a za nabavku kompleta udžbenika za 60 osnovaca oko 8.000 KM.

I ove godine Općina Stari Grad je obezbijedila 12.000 KM za finansiranje odlaska na ekskurziju 15 starogradskih osnovaca.

Obrazovanje

U školskim klupama 273 starogradska prvačića



Dobrodošlica za prvačiće OŠ "Šejh Muhamed ef. Hadžijamaković"

Nova školska godina za 2.801 učenika šest starogradskih osnovnih škola i Osnovne muzičke škole "Mladen Pozajjić" počela je 3. septembra, a u školske klupe prvi put su sjela 273 prvačića, za koje je Općina Star Grad obezbijedila ruksake i školski pribor. Tim povodom Ibrahim Hadžibajrić, načelnik Općine Stari Grad i Amina Deljković, pomoćnica načelnika za obrazovanje, kulturu i sport su 3. septembra, posjetili Osnovnu školu "Šejh Muhamed efendija Hadžijamaković" i područnu školu "Sedrenik" i prvačićima podijel-

ili ruksake i zaželjeli im dobrodošlicu. Načelnik Hadžibajrić prvačićima je zaželio sretan početak škole, a njihovim roditeljima i nastavnicima da ih izvedu na pravi put. Prvi dan u školskim klupama bio je i za prvačiće Vedada Čimpu. Kaže da je spremno dočekao školsku godinu. "Lijepo mi je bilo danas u školi i drago mi je što ću upoznati nove drugare", rekao je Vedad Čimpo. U svim starogradskim osnovnim školama učenici starijih razreda su za svoje mlađe kolege pripremili prigodan program i zaželjeli im dobrodošlicu u školske klupe.

Stipendije nadarenim učenicima i studentima

Općina Stari Grad po prvi put je 10. jula, 2012. godine podijelila stipendije za nadarene srednjoškolce i studente. Načelnik Općine Stari Grad Ibrahim Hadžibajrić i pomoćnica načelnika za obrazovanje, kulturu i sport Amina Deljković potpisali su Ugovore o dodjeli stipendija sa šest srednjoškolaca i tri studenta. Stipendije su dodijeljene za školsku 2011./2012. godinu, u iznosu od 120 KM za studente i 80 KM za srednjoškolce.

Amina Kadrić, jedna od dobitnica stipendije, zahvalila se Općini Stari Grad na dodijeljenoj stipendiji, te dodala kako joj je ovo prva stipendija u školovanju.

Glavni kriterij za odabir stipendista bila je prolazna ocjena u prethodnoj školskoj godini: za srednjoškolce najmanje 4,8, a za studente 8,5.



Studenti i srednjoškolci dobitnici stipendija

Otvorena Memorijalna galerija 11/07/95

Memorijalna galerija 11/07/95, čiji je cilj sačuvati sjećanje na stradale Srebreničane, otvorena je 12. jula, 2012. godine u Sarajevu. Riječ je o prvoj ovakvoj postavci u BiH i posjetiocima nudi autorske fotografije Tarika Samaraha, videodokumente – Mapiranje genocida i izjave preživjelih svjedoka, portrete stradalih i mape lokacija do sada pronađenih masovnih

grobnica. Izložba je postavljena u prostoru od oko 280 metara kvadratnih koje je organizatorima dodijelila Općina Stari Grad uz saglasnost Općinskog vijeća Stari Grad.

Memorijalnu galeriju, čiji su organizatori Turska agencija za međunarodnu saradnju i koordinaciju (TIKA) i Općina Stari Grad, vodit će Udruženje “Kultura sjećanja”.



Memorijalna galerija - sjećanje na stradale Srebreničane

Okončan projekat “Akademija za građane”

Projekat “Akademija za građane”, koji je realizovan u Općini Stari Grad, zvanično je završen 29. avgusta, 2012. godine dodjelom certifikata za 32 građanina koji su uspješno završili obuku u sklopu ovog projekta. Certificate je građanima, ali i zaposlenicima Općine Stari Grad, koji su organizovali predavanja, uručio Ibrahim Hadžibajrić, načelnik Općine. Ceremoniji je, osim građana i predstavnika Općine Stari Grad, prisustvovao i Christopher Teutsch, službenik za lokalnu upravu pri Misiji OSCE-a u BiH. Predstavnik OSCE-a zahvalio se Općini Stari Grad i njenom menadžmentu na podršci pri organizaciji i realizaciji ovog projekta, te je kao znak zahvalnosti

na pruženoj pomoći uručio certifikat načelniku Hadžibajriću.



Teutsch sa Hadžibajrićem

Hadžibajrić načelnik godine



Podrška slušaoca Kalman radija

Ibrahim Hadžibajrić, načelnik Općine Stari Grad, prema ocjeni slušaoca “Kalman” radija, načelnik je godine u Bosni i Hercegovini.

Priznanje za načelnika godine Hadžibajriću je uručeno 10. septembra, na svečanoj ceremoniji obilježavanja 15. godišnjice postojanja i uspješnog rada “Kalman” radija.

Predstavnici “Kalman” radija, tokom proglašenja načelnika godine, istakli su kako su slušaoci ovog radija načelnika Hadžibajrića ocijenili kao visokomoralnu, komunikativnu i tolerantnu osobu s velikom dozom humanizma u sebi. Kazali su kako je u javnosti ostao upečatljiv po svojoj izjavi da je “Bosna i Hercegovina sa svojom tradicijom odavno u Evropi i da Evropa treba da uči od nas”.

Grafike slikara Mustafe Arapija



Predstavio Sarajevo i Albaniju

Izložba grafika sa sarajevskim motivima albanskog umjetnika Mustafe Arapija, otvorena je 12. jula, 2012. godine u Općini Stari Grad u okviru međunarodnog festivala “Baščaršijske noći” i obilježavanja stogodišnjice nezavisnosti Albanije. Organizatori izložbe bili su Ambasada Republike Albanije u BiH, Općina Stari Grad i Sarajevo Art. Mustafa Arapi u Velikoj sali Općine Stari Grad je izložio 60 svojih grafika, od kojih njih 20 predstavljaju Albaniju, a 40 Sarajevo.

Podijeljeni paketi za 36 porodilja



Pomoć porodiljama iz Starog Grada

Pakete za bebe 19. jula, 2012. godine dobilo je 36 porodilja koje žive u Općini Stari Grad, a nalaze se u stanju socijalne potrebe. Paketi su sadržavali organsku hranu za bebe i šampon za kupanje. Pravo na pomoć imale su porodilje s bebama do sedam mjeseci starosti.

Pakete za starogradske porodilje je obezbijedila firma "Megamix". Pomoć je dobila i Sabina Sendo, majka četvero djece. "Sa svojom djecom preživljavam od porodiljske naknade i dječjeg doplatka. Živim u trošnoj kući bez vode i struje. Pomoć koju sam dobila dobro će mi doći i zahvalna sam Općini Stari Grad", rekla je Sabina Sendo.

Počast ubijenim Sarajlijama



S polaganja cvijeća

Polaganjem cvijeća i učenjem Fatihe u Ulici Mula Mustafe Bašeskije do broja 64 (ulaz u Gradsku tržnicu) i Ulici Halači delegacija Općine Stari Grad odala je počast ubijenim sugrađanima.

U Ulici Mula Mustafe Bašeskije 28. avgusta, 1995. godine poginula su 43 građanina, a njih 84 je teže i lakše ranjeno. U Ulici Halači 23. avgusta, 1992. godine od agresorske granate poginulo je osam građana Sarajeva, a troje ih je teže ili lakše ranjeno.

Privreda

Deseti Internacionalni sajam pčelarstva

Deseti Internacionalni sajam pčelarstva i pčelarske opreme - Dani pčelarstva "Bee fest" 12. septembra, u ime Općine Stari Grad, je otvorila Amina Deljković, pomoćnica načelnika za obrazovanje, kulturu i sport.

Sajam, na kojem će svoje proizvode predstaviti oko 70 izlagača iz BiH i zemalja regiona, bit će otvoren na Trgu oslobođenja – Alija Izetbegović do 16.

septembra.

Ovogodišnji "Bee fest", kako je kazala Samira Katica - Arnautović, direktorica sajma, bit će posvećen medu kao poklonu, pojasnivši kako je 97 odsto ispitanika u anketi koja je provedena uz podršku USAID/Sida Farma projekta istaklo kako se raduju medu kao poklonu, ali da ga isto tako rado poklanjaju drugima.

Organizator "Bee festa" je pripremio bogat program za ovogodišnji sajam, a planirano je i takmičenje za najkvalitetniji med i druge pčelinje proizvode, te konkurs za najbolje likovne i literarne radove o temi „Med je cool“. U sklopu sajma bit će organizovana i edukacija za sve pčelare iz Bosne i Hercegovine.

Podršku u organizaciji sajma i ove godine su pružili Ministarstvo poljoprivrede, vodoprivrede i šumarstva BiH, Vlada Kantona Sarajevo, Općina Stari Grad, USAID/Sida Farma projekat.



Bogata ponuda proizvođača meda

Popravka oštećenih plastenika



Jedan od popravljenih plastenika

Projekat popravka plastenika u Starom Gradu oštećenih tokom obilnih snježnih padavina u februaru, koji je počeo u avgustu, je u toku. Sve plastenike koje je snijeg uništio, njih 53, sanirat će uposlenici firme "ITC".

Komisija za procjenu šteta je nakon padavina u februaru obišla sve lokacije i ustanovila da šteta na plasticima iznosi oko 83.000 KM. Stepenn oštećenja nije isti na svim plasticima, tako da su neki potpuno uništeni, a neki djelimično. Tamo gdje je bilo moguće, vlasnici su

sami privremeno popravili plastenike i osposobili ih za korištenje. U takvim plasticima vlasnici su zasadili različite vrste povrća. Zbog toga rekonstrukcija tih plastenika bit će završena tokom septembra, odnosno kada vlasnici ubere urod.

Novac za sanaciju plastenika obezbijeden je u rebalansu budžeta Općine Stari Grad, a odluku o odobravanju novca za popravku plastenika usvojilo i Općinsko vijeće Stari Grad na junskoj sjednici.

Bajramske hedije boračkim porodicama



S podjele bajramskih hedija

Općina Stari Grad je i ove godine, povodom Ramazanskog bajrama, organizovala druženje i podjelu hedija šehidskim i porodicama poginulih boraca. Druženje uz kafu i sokove upriličeno je u Velikoj sali Općine, drugog dana Bajrama koji se tradicionalno obilježava kao Dan šehida. Za stotinu šehidskih i porodica poginulih boraca obezbijedena

je hedija od po 100 KM. Druženju su prisustvovali načelnik Općine Stari Grad Ibrahim Hadžibajrić, predsjedavajući Općinskog vijeća Rizah Avdić, pomoćnik načelnika za boračko-invalidsku zaštitu Sakib Avdibegović, predsjednica organizacije šehida i poginulih boraca KS Bahra Kituša, te predsjednik Udruženja šehidskih porodica iz Starog Grada Adem Čatović.

Prehrambeni paketi za borce

Ramazanske prehrambene pakete dobilo je 150 pripadnika boračkih populacija u Općini Stari Grad. Pakete je dobilo 50 porodica šehida i poginulih boraca, 50 ratnih vojnih invalida i 50 demobilisanih boraca. Riječ je o poklonima koje Općina Stari Grad već tradicionalno obezbjeđuje za pripadnike boračkih populacija. Ovogodišnji paketi sadržavali su osnovne prehrambene namirnice: brašno, ulje, šećer, rižu, grah, sir. Paket je dobila i Pašana Krilo, koja je 1993. godine izgubila sina Rasima. "Zahvaljujem se Općini Stari Grad na ovoj pomoći. Hvala im što su nas se sjetili i nisu zaboravili", rekla je Pašana Krilo.



Podijeljeni paketi s namirnicama

Vladimir Prelog

(Sarajevo, 1906. – Zürich, 1998.)



Bosna i Hercegovina ima dva nobelovca: dobro poznatog Ivu Andrića (1892 - 1975.),

dobitnika Nobelove nagrade za književnost 1961. godine i nažalost manje poznatog dobitnika Nobelove nagrade za hemiju 1975. godine – Vladimira Preloga. Osim činjenice da su nobelovci Andrić i Prelog rođeni u Bosni zajedničko im je i to da su obojica bili stipendisti HKD Napredak. Vladimir Prelog rođen je u Sarajevu u kojem je, dok je živio, pohađao pučku školu, a istu je završio u Zagrebu, jer je 1915. godine s ocem otišao iz Sarajeva u Hrvatsku. Međutim, njegovo školovanje nastavit će se u Osijeku u kojem je završio gimnaziju, koju je prethodno započeo u Zagrebu. Upravo u toku boravka i školovanja u slavonskom gradu Osijeku, Prelog se počeo interesovati za hemiju. To interesovanje za hemiju budno je pratio njegov gimnazijski profesor Ivan Kurija, pod čijim je mentorstvom objavio svoj prvi naučni rad iz hemije. Rad je objavljen u „Chemicer Zeitungu“, a Prelog je tada imao tek 15 godina. Nakon srednje škole, koju završava 1924. godine, Prelog svoje školovanje nastavlja u Pragu gdje upisuje studij hemije i završava ga 1928. godine. Godinu dana kasnije doktorira u istom gradu po mentorstvom Emila Votočeka. Nakon formalnog školovanja sve do zvanja doktora nauka Prelog radi kao uposlenik laboratorije i predavač na fakultetu u Zagrebu. Njegova profesura u Zagrebu biva prekinuta 1941. godine zbog teške političke situacije koja će kulminirati Drugim svjetskim ratom i režimom NDH-zije. Prelog je nastavio svoj naučni rad u Švicarskoj i to u Tehničkoj visokoj školi u Zürichu. Njegova naučna aktivnost u Švicarskoj trajat će do kraja života, a najviše priznanje koje dobio desilo se 1975. godine. Naime, riječ je o Nobelovoj nagradi koju je dobio za svoja istraživanja iz oblasti organskih prirodnih spojeva i stereochemije.

*Alija Ibrović
dipl. orijentalist*

Hrid – Jarčedoli

Na lijevoj obali rijeke Miljacke smješšana je jedna od 16 starogradskih mjesnih zajednica Hrid – Jarčedoli. U njoj živi oko 4.600 stanovnika i graniči s mjesnim zajednicama Babića bašča, Mahmutovac i Širokača.

šadrvan iz 1914. godine, a preko puta džamije postoji i Gornja česma koju je sagradio Hadži ef. Fazlić.

Osim po ovoj džamiji, Mjesna zajednica Hrid – Jarčedoli prepoznatljiva je po Ulici Mujezinova u kojoj se nalazila rodna kuća Umihane Čuvidine. To je prva pjesnikinja Bošnjakinja i jedna od



Turbina na hidrocentrali hrid

Ovo mjesno područje bogato je brojnim građevinama od kulturno - historijskog značaja, a neke od njih su Sagrahadži Alijina džamija, Mujezinova ulica, hidrocentrala Hrid.


Sagr-hadži Alijina džamija

Sagr-hadži Alijina džamija je sagrađena 1528. godine, a smješšana je na teritoriji nekadašnje Alijine mahale na Hridu. U dvorištu džamije nalazi se

prvih koja je pisala na našem jeziku. Pretpostavlja se da je rođena 1794., a umrla oko 1870. godine. Mezar joj se nalazi Pod gajem na Hridu. Jedina njena sačuvana pjesma u izvornom obliku je epos od 79 stihova pod nazivom „Sarajlije idu na vojsku protiv Srbije“.

Hidrocentrala Hrid

Hidrocentrala Hrid, koja je također smješšana u MZ Hrid-Jarčedoli, predstavlja veoma rijedak primjer industrijskog naslijeđa iz perioda Austro-Ugarske vladavine na području današnje BiH. To je specifičan primjer objekta hidroelektrane u kojoj se tlačnim čeličnim cjevovodom



dužine oko 3.200 metara voda sa Brusa na Trebeviću dovodi u centralu koja se koristi za pokretanje turbina i proizvodnju električne energije. Centrala je izgrađena u periodu od 1913. do 1917., a puštena je u rad 1918. godine. Bila je u pogonu sve do 1999. godine.



Sagr-hadži Alijina džamija

Savjet Mjesne zajednice

1. Tarik Bjelak – Predsjednik
2. Mujo Klino – Član
3. Alen Mašić – Član
4. Inda Kršo – Član
5. Salem Hodžić – Član
6. Izet Gagula – Član
7. Ujkan Turković – Član

Sjedište: Ul. Jarčedoli 3
Telefon: 033 533 443
Sekretar MZ: Nedžad Bjelak
e-mail: mz.hridjarcedoli@starigrad.ba

1001 starogradski biser

Jedan od prethodnih brojeva "Starogradskih habera" posvetili smo sarajevskim mezaristanima. U tom tekstu naglasak smo stavili na mezarluke, odnosno nišane – nadgrobnjake islamske provincijalnosti. U istom tekstu kratko smo se osvrnuli na fenomen groba u općem smislu, ali i na fenomen stećka. Tim kratkim osvrtom pokušali smo sugerisati svojevrsni kontinuitet koji se da pratiti od stećka pa do kasnijih nadgrobnih spomenika u BiH svih etnija i konfesija. U ovom tekstu nastojat ćemo da ukažemo na neke elementarne povijesne i umjetničke činjenice i vrijednosti stećka. Kažimo još da je mnogo razloga zašto ovaj tekst posvećujemo stećku, ali izdvojimo jedan – stećak ima svoje mjesto u široj vizuri Starog Grada, on nije nepoznanica ovog dijela BiH.

Gotovo da ni o čemu, a što je iz bh. prošlosti, nije ispričano toliko oprečnih kazivanja kao što je o stećku. Istina, uz ta kazivanja šta je ili još preciznije čiji je stećak, tijesno je vezana priča o Crkvi bosanskoj, odnosno o tome je li ta crkva: maniheistička (dualističko-bogumilska), pravoslavna, rimokatolička ili pak autentična šizmatička (raskolnička) crkva, koja nije priznavala autoritet i crkvenu hijerarhiju ni Zapadne ni Istočne crkve. Pokušat ćemo u ovom tekstu ne doticati se toga kakva je bila Crkva bosanska i općenito religiozno-konfesionalna slika srednjovjekovne Bosne (uz svo saznanje da takvo što donosi sa sobom brojne propuste i zamjerke). Ipak morat ćemo navesti historijsku činjenicu, koju je braniti (dokazivati) danas „ravno“ slijedećoj sufijskoj situaciji. Pitali su nekog sufiju da dokaže postojanje Boga. Upitani im je kazao da je tako što poput traženja sunčevog svjetla i to s lampom u ruci u sred bijela dana. O slijedećem bh. povijesnom faktoru je riječ – srednjovjekovna Bosna u konfesionalnom smislu bila je izrazito pluralna. Ta pluralnost bila je moguća, između ostalog i zbog toga što u Bosni nije vladalo dobro poznato evropsko pravilo koje glasi "cuius regio, eius religio", tj. čija zemlja, njegova i religija. Pluralna srednjovjekovna Bosna bila je pogodno tlo za „kulturalne vjetrove“ koji su i sa Istoka i sa Zapada dolazili, a u tom susretu kultura ondašnji Bošnjani gradio je i njegovao autentičnu kulturnu tradiciju, koja je svoju materijalnu kristalizaciju pronašla upravo u stećku – kulturno-umjetničkom bosanskom, srednjovjekovnom, svenarodnom fenomenu par excellence. Šta je stećak, kada se javlja i do kada traje, na kom prostoru ga nalazimo, ko su njegovi graditelji, koje su njegove umjetničke vrijednosti – samo su neka pitanja koja ćemo ovdje

naslutiti, u nadi da će ovaj tekst, u ostalom kao i svi prethodni, navesti čitatelja na vlastita propitivanja o temi o kojoj pišemo.

Stećak je srednjovjekovni bosanski nadgrobni spomenik kojeg u biti vežemo za prostor i vrijeme srednjovjekovne Bosanske države. Međutim, u koliko stećak zapažamo izvan prostora srednjovjekovne bosanske države ili izvan vremena srednjovjekovlja, to ni u kom slučaju ne znači da stećak nije, prije svega, srednjovjekovni bosanski nadgrobni spomenik. Dakle, stećke prije svega nalazimo na prostoru BiH, ali i na prostorima Dalmacije, Srbije i Crne Gore. Također, vrijeme u kojem se stećak javlja, razvija ali i nestaje jeste srednjovjekovlje, što opet ne znači da ga nećemo naći i u postsrednjovjekovnom periodu, a što

snažnim utjecajem evropske romaničko-gotičke tradicije. Ako imamo poteškoće u iščitavanju ikonografskog znakovlja, iščitavanje epitafa na stećku je donekle lakše. Istina, epitafi su dosta rijetki i često puta pored svoje formalne čitljivosti u suštinskom, semantičkom smislu znaju također biti potpuno strani ljudima modernog vremena. Recimo još da su stećke radili majstori klesari (kovači), dok je epitafe sastavljao pisar (dijak). Čudno je to sa bosanskim srednjovjekovnim kamenim nadgrobnjacima. Čudno u toliko što danas više nego ikada o njima pišemo i govorimo, svojatamo, branimo, ne damo, isključujemo, a pri tome svi skupa ih najčešće ili gotovo uvijek nazivamo istim, a u biti neautentičnim nazivom - stećak (!). Stari dobri Bošnjani nisu poznavali taj naziv za svoje nadgrobnjake, oni su ih

Stećci - Slovo o vječnosti

neosporava činjenicu da on jeste srednjovjekovni spomenik. Rezimirajmo priču o vremenu stećka i recimo da od XII do XVI stoljeća stećak doživljava nastanak, razvoj i kraj svog aktivnog sudjelovanja u životu dobrih Bošnjana. Razvoj umjetnosti stećka najlakše pratimo kroz modifikacije njegovog oblika. U početku on se javlja u obliku ploče sa ili bez postolja, zatim se javlja razvijeni oblik sanduka i sarkofaga (sljemenjaka) na dvije vode – također sa ili bez postolja. Međutim, postoji još niz oblika prelaznih faza, kao i brojni antropomorfni oblici. Spomenimo još krstolike oblike i naravno stele. U gotovo svim navedenim oblicima možemo prepoznati „ishodišne“ oblike kasnijih nadgrobnih spomenika kod svih bh. religiozno-konfesionalnih zajednica. Osim oblikom stećak također i reljefom, odnosno ikonografskim sadržajem predstavlja iznimno bogat slikovni okamenjeni govor srednjeg vijeka, kojeg je sa naše vremenske distance iznimno zahtjevno iščitavati, a ponekad je to čitanje i razumijevanje potpuno nejasno, jer je značenje pojedinih likovnih formi izgubljeno u vremenu. Kada smo već kazali riječ-dvije o ikonografiji recimo još i to da baš u tom segmentu umjetnosti stećka jasno uočavamo da je on pod

zvali: zlamen, bilig, kam, mramor, kuća i vječni dom. Čovjek modernog doba još od XIX st. zove ih stećkom. Valjda zato što ne zna za Vječni dom, a kako bi i znao kad je, kako kazuju perenijalisti XX stoljeća, homo modernus – čovjek trenutka, čovjek koji ne zna odakle je ni kamo će.



„Neka oprosti gospoda Evropa, samo Bosna ima spomenike, STEĆKE. Šta je stećak? Oličenje gorštaka, Bosanca! Šta radi Bosanac na stećku? Stoji uspravno! Digao glavu, digao ruku! Ali nigdje nikad, niko nije pronašao stećak na kome Bosanac kleči ili moli, na kome je prikazan kao sužanj.“ (Miroslav Krleža, 1893-1981.)

Najljepše bašče, avlije i verande u Starom Gradu

Projekat "Izbor najljepše avlije-dvorišta, bašče-vrta i verande-balkona na području Općine Stari Grad" u ovoj općini realizovan je po prvi put u julu. U ovom projektu takmičilo se 20 mještana Starog Grada koji

su uređenjem svojih bašči, avlija i verandi nastojali očuvati tradicionalne ambijentalne cjeline Starog Grada. Mještani s najljepšim baščama, avlijama i verandama dobili su i prigodne nagrade i poklone.

